

四庫全書

史部

欽定四庫全書

欽定大清會典則例卷一百三十三

工部

都水清吏司

河工三

一修防康熙二年覆準凡黃運湖河大工告竣
保固限滿交汛修防其工當大溜頂衝汛水長
發在在險急相度情形必須每年動帑用長椿

大埽修築加鑲歲以為常嗣後歲修工程令河道總督蒞秋汛水涸時即估計具題○十八年題準搶修工程雖難豫定或因河流遷徙損及隄岸或因三汛屆臨致壞工程亦應照歲修例估計具題其費以五百兩為率別項大工不在此限○二十四年議準搶修工程隄岸牆壩偶被損傷該管廳官一面申報河道總督一面即運料修防勒令剋期告竣仍詳具工費繕冊題

銷○三十七年議準永定河工照黃河歲修搶修之例辦理○五十二年覆準嗣後一應歲修搶修工程均令河道總督親勘以杜冒銷之弊○雍正二年議準嗣後歲修工程於本年十月內題估次年四月內題銷逾限不銷者著授受各官賠償工費至搶修工程將衝決丈尺動用何項錢糧報部工完之日彙冊題銷遲至次年四月不題銷者如前賠償其歲修及別項大工

動用何項錢糧於題估日一并聲明○三年議
準永定河工程如遇緊要險工一面興修一面
具題其歲修搶修工程亦令先行題估工竣題
銷以杜侵冒○七年

諭黃河隄岸乃運道民生所關最為緊要年來殫心經
理增卑培薄隄工堅固共慶安瀾獨是工程告竣例
應歸汛修防而額設河兵堡夫只能修補水浪衝激
之處防備臨時搶護之用至於隄身一年之內風雨

淋漓車馬踐踏漸至侵損者亦勢所必有而隄遠工多不能責諸寥寥兵役也朕留心訪察已久又復詢問通曉河工之人知河防一覽內載有每歲令夫加高五寸之請即從前總河亦有每丁一名招募幫丁四名給以隄內空地耕種免糧歲令加高五寸之議與朕計慮實相符合朕思隄工雖千有餘里若按丈每年加修五寸計費不過三四萬金倘置之不問一年剝削四五寸合十年而計之其所費之多恐有不

止於加修之數者況河流漲漫不時難以豫料何若
逐年增修為未雨綢繆之計欽此○十年議準歲修
工程應編列字號開明起止段落長濶高厚尺
寸造冊報部至搶險別建之工交汛修防應附
入歲修者於題估冊內豫為聲明○乾隆四年
議準山東運河每年春夏之交山水未發令建
築草壩以收水勢而濟漕運歸於歲修案內題
銷○十三年議準江南隄工綿亘數千餘里於

每年加高五寸之外歲修搶修內通融辦理以該年節省之數加培隄工

一汛候順治初年定分汛防守之法每歲立春後東風解凍候水初至量水一寸則夏秋當至一尺頗為信驗故汛水亦稱信水二月桃始華冰泮雨積川流匯集波瀾盛漲曰桃汛春暮蕪菁作花曰菜花汛四月麥壠結秀擢芒變色曰麥黃汛五月瓜實延蔓曰瓜蔓汛朔野之地山

深谷邃冰堅晚泮迨至盛夏消釋方盡沃蕩山石水帶礮腥并流於河故六月中旬之水曰礮山汛七月菽方秀曰豆花汛八月荻蘆華曰荻苗汛九月以重陽紀節曰登高汛皆隨時長發其防守之法則統於桃伏秋三汛自清明節起閱後二十日為桃汛自桃汛後至立秋前為伏汛自立秋至霜降節為秋汛汛臨之時該管官弁責令河兵堡夫加謹分防每里設立窩舖舖

各標旗編書字號夜則懸燈鳴金以備搶護晝則督率兵夫捲土牛小埽聽用遇有刷損隨刷隨補毋使坍塌卸至夜分巡守易於曠廢應設立五更牌面分發南北兩岸照更次挨發各鋪遞傳如天字鋪發一更牌至二更時前牌未到日字鋪察明何鋪稽遲即時拏究再汛發之時多有犬風猛浪隄岸難免衝激應督令隄夫多紮埽料用繩椿懸繫附隄水面縱有風浪隨起隨

落足資防護又凡驟雨淋漓易致橫決應置備
簑笠令兵夫冒雨巡守此外非時客汎及十月
復槽汎十一月十二月颶凌汎非三汎可比止
令兵夫照常巡守凡黃運河工一例遵行○康
熙二年議準嗣後黃運河工保固工程及舉劾
官弁必以經閱三汎為斷○十二年定嗣後三
汎平穩令各總河馳驛奏報○三十七年議準
永定河工照黃運河例令該管官弁督率兵夫

分汛防守○四十五年議準奏河工急務者限
兩三日飛遞馳送○雍正十二年議準三汛平
穩本章著河臣酌量寬期

一疏濬順治二年議準凡濬河面宜濶底宜深
如鍋底樣庶中流常深岸不坍塌如無隄之處
須將土運於百餘丈外以免淋入河內遇河流
淤淺即令疏濬如水溜在中兩岸築丁頭壩以
束之水溜在旁順築束水長壩以逼之或排板

插下泥內逼水涌刷或排小船或用勺或用混
江龍或用刮板皆因地制宜不拘器具○十年
題準南旺臨清每年於十一月十五日煞壩濬
淺每年一小濬間年一大濬○康熙三十九年
議準嗣後堰河之土盡堆原估隄上層層杵礮
成隄不許估計散土滋弊倘濬堰不深以至引
水淹漫虛報淤墊者除錢糧不準開銷外以侵
帑誤工題叅拏問○五十一年議準通州石壩

至沙子營地方河道淤淺每年將中流酌量掘
濬以利漕運○雍正二年覆準南旺臨清均屬
漕運咽喉大濬小濬仍遵舊制每年於十一月
內煞壩一面確估具題一面興工於正月內完
工或因糧船回南過遲亦必催趨於正月杪掘
濬告竣無誤重運○五年議準運河湖河相連
之處用刮泥器具引湖水以攻沙如河身有淤
墊之處相度疏濬○又奉

旨所開河道土方若目前圖便堆積河岸將來雨水淋漓必致仍淤河道務令運送遠處以為一勞永逸之計○七年議準京口一帶運河為漕船經由要道每

歲令該管官及時疏濬以濟重運○八年議準串場河道積沙用犁船犁鬆再用混江龍按時疏濬○又議準泰州興化所屬各鹽場河道每遇疏濬海口之時令東台同知督率牯官牯夫雇覓水手人夫乘迴潮之勢用混江龍拖刷務

使海口通暢○十一年覆準直隸運河既有額
設淺夫凡糧船經由要道責令以時疏濬○乾
隆元年

諭揚州府儀徵縣江口至江都甘泉二縣所轄三汊
河一道共計六十餘里為通江達淮要津向例三
年大濬一次撈淺一次需銀一萬六百兩皆商七
民三分派捐輸經管里甲不免苛索滋擾而承修
各官又復層層侵扣以致撈濬皆有名無實無益

工程有累百姓嗣後著將商民派捐之項永行停止亦不必拘定三年之限如遇應濬之年該鹽政委官確估實力疏濬所需工費即於運庫一半充公項下動支毋得虛冒侵肥草率塞責欽此○又諭今歲江南夏秋之間天雨連綿淮揚一帶各州縣低窪田畝被水淹漫朕恐窮民失所已諭令督撫加意振卹俾獲安居今思此等百姓若於冬春之交再令傭工以資力作更為有濟宿遷桃源清河

安東以及高郵寶應等州縣均有應行疏濬之河道其安東舊鹽河約估需銀二萬二千餘兩宿桃清高寶等工約估需銀十有二萬餘兩著於今冬明春次第興工即令崔募民夫及時疏濬則於緊要河道既得深通而寓振於工窮黎更得藉以養贍於地方民生大有裨益欽此○又議準直隸運河改設河兵責令隨時疏濬河道勿致淤淺○又議準串場河道歲以春秋二汛按日拖刷務

令處處深通。○二年奏準疏濬泉河以通泉流
每年於十月水落之後嚴飭管泉通判協同管
泉各官逐一察勘遇有淤淺募夫疏濬凡濬山
泉之河深五尺者上口濶三尺底濶一尺以為
定式。○又奏準東省運河每年定於十一月初
一日煞壩疏濬。○又奏準牯河之水務以四尺
為度糧船自無淺阻。○又覆準德州哨馬營支
河照歲修之例每年疏濬。○又議準東省疏濬

泉流應置刮板四十具鐵畱百具捱牌板片六
百塊以備臨時撥用○三年覆準東省大濬運
河按期展限八日小濬按期展限六日○四年
奏準凡黃水減下之支河每歲秋冬河官勘驗
稍為阻礙即令疏濬○七年奏準淮揚一帶運
河每年伏秋汛過勘明汕刷情形如有淤墊及
時堰濬中泓以一丈為準兩邊以八尺為度○
又定豫省衛河河身寬濶崖岸陡峻河底又多

流沙不能築壩堰濬應用船撈濬○八年議準
丹徒丹陽一帶運河每年測量水勢間段撈濬
定限六年長濬一次○十一年覆準北運河設
立岱船以資撈濬○十四年議準裁汰北運河
岱船其額設刮板三十具實屬不敷應增置三
十具以廣器用以利漕渠

一浚柳船江南柳船四十有一大浚船四百七
十有二中浚船五十小浚船七十有二分隸廳

營石船四十有四隸葦蕩營柳船長七丈五尺
至八丈濶一丈至丈六尺五寸各有差深二尺
四寸三年小修工料銀十有九兩四錢五年大
修銀二十九兩四錢八年更造銀四十六兩九
錢各有奇大浚船長三丈六尺至三丈九尺濶
六尺五寸至七尺六寸各有差深二尺五寸小
修工料銀七兩七錢大修銀十有一兩六錢更
造銀十有七兩三錢各有奇中浚船長三丈濶

五尺六寸深尺有八寸小修工料銀六兩五錢
大修銀九兩九錢更造銀十有四兩九錢各有
奇小浚船長二丈九尺五寸至三丈濶五尺二
寸至五尺六寸各有差深尺有八寸小修工料
銀五兩四錢大修銀八兩一錢更造銀十有二
兩三錢各有奇以上修造年限並與柳船同石
船長七丈至七丈六尺濶丈二尺至丈五尺深
五尺至五尺四寸各有差修造年限及工料銀

並與柳船同○河南柳船二十有六分隸各廳
每船長五丈五尺濶丈有三尺深三尺三寸小
修工料銀十有四兩一錢大修銀二十兩八錢
更造銀四十二兩三錢年限與江南柳船同○
直隸岱船三百二十分隸天津道屬之子牙河
永定河道屬之三角淀清河道屬之西淀內有
行船土槽船之別行船長二丈二尺濶四尺五
寸深尺有一寸每歲油艙工料銀一兩四錢三

年小修銀三兩三錢五年大修銀五兩十年更
造銀十兩土槽船長二丈濶四尺五寸深尺有
一寸油艙工料銀一兩一錢小修銀二兩六錢
大修銀四兩更造銀八兩年限與行船同○康
熙十七年議準江南河工設大小浚船柳船五
百三十有二分隸八河廳營為疏淤運料之用
○三十一年覆準江南浚柳船修理照驛站船
例開銷自成造之年起限三年小修五年大修

八年更造○雍正二年議準江南浚船開明三等丈尺式樣令總河移送豫省每汛照式建造五船修理年限悉照江南浚船之例○六年覆準豫省浚船額定四十柳船亦照江南之例成造二十二船○十二年議準高堰裝運石料歸公船六十號應分隸各廳濟運物材○十三年諭聞河工官員每於裝運工料差役捉船而所差胥役即藉端封捉商船生事騷擾及至三汛搶工則稱裝

運緊急物料百般需索甚將重載客船勒令中塗起
貨致回空商船聞風藏匿裹足不前既於客商擾累
且於關稅虧少河工裝運物料原有額設浚船即使
搶築之時浚船或不敷用祇應雇募本地民船協濟
運送原不必封捉客船阻遏商旅著河道總督嚴行
察禁如該役等陽奉陰違仍前勒索即將該管官題
叅欽此○又議準高堰歸公船除坍塌不堪修造外
額存石船四十有四各廳向有浚柳各船獨葺

蕩一營無額設運料之船應改隸該營管理歸
於柳船案內一併修造○乾隆三年覆準設直
隸河工岱船屬子牙河者百有六十屬三角淀
西淀者各八十○六年奏準裁豫省浚船四十
增柳船四○十一年覆準直隸北運河設岱船
六十○十四年議準直隸岱船大小修理年限
如江南之例更造以十年每年一油艙其北運
河六十船應裁額存船三百二十內定為行船

四十土槽船二百八十修艙更造分別給銀有
差

河工四

一考成保固順治初年定黃運兩河隄岸修築
不堅一年內衝決者管河同知通判州縣等官
降三級調用分司道員降一級調用總河降一
級留任如異常水災衝決者專修督修官皆住
俸修築完日開復本汛隄岸衝決隱匿不報別

指他處申報者加倍議處如一年外衝決者管
河等官革職戴罪修築分司道員住俸督修完
日開復本汛隄岸衝決隱匿不報別指他處申
報者管河等官降二級調用分司道員降一級
調用總河不詳察具題罰俸一年如地方衝決
少而申報多者降三級調用轉詳官降二級調
用總河不察實具題降一級留任無論一年二
年遇有衝決地方限十日申報逾限者降二級

調用其沿河隄岸不能先期修築以致漕船阻滯者經管官降一級調用該管官罰俸一年總河罰俸六月○十六年議準河工各官遇有升遷降調事故將任內修防事宜造冊交代離任後有隄岸衝決者該管官叅處○十七年題準修築隄岸工完令承修官出具伏秋無虞印結同冊奏銷如本年衝決者即指名叅處○康熙元年題準黃河隄岸衝決在一年內者叅處修

築之官在一年外者叅處防守之官運河隄岸
衝決在三年內者叅處修築之官在三年外者
叅處防守之官如黃河工未至一年運河工未
至三年修築官於保固限內去任防守官不為
料理致被衝決者將防守官一并叅處○九年
題準河工衝決地方承辦樁柳等物遲緩或稱
非繫本汛推諉誤工者皆降一級調用不行轉
催之上司罰俸一年○十五年議準河道關繫

甚大隄岸往往衝決皆由修築不堅防守怠玩所致宜嚴定處分之例嗣後不得諉之水災具題黃河隄岸仍定限一年運河隄岸仍定限三年黃河隄岸半年內運河隄岸一年內衝決者經修防守等官皆革職分司道員降四級調用總河降三級留任黃河隄岸過半年運河隄岸過一年衝決者經修防守等官降三級調用分司道員降二級調用總河降一級留任如已過

年限衝決者管河各官皆革職戴罪修築分司
道員住俸督修工完開復總河罰俸一年若年
限內衝決經修之官已去仍將經修官與防守
官一同處分其年限內本汛隄岸衝決別指他
處申報者經修防守等官皆革職分司道員降
五級調用總河不察實具題降三級調用其餘
仍照舊例○十七年議準知府有地方之責嗣
後如遇衝決等事照道員處分承修兩河隄岸

一應工程均限半年完工半年不完承修官罰俸一年督修道府罰俸半年再展限三月完工如仍不完承修官降一級調用督修道府罰俸一年如承修官原繫革職戴罪之人半年限內不完降一級調用不準展限工程別委他官仍限三月完工不完罰俸一年督修道府所屬官員工程一年內不完降一級調用限內不完總河不題叅罰俸三月若實繫大工不能依限完

竣令總河豫為題明其監理廳印分管佐雜等
官所築隄工合式堅固該管廳印河官出具甘
結道府驗實加結申送總河勘實具題準照應
升之官加二級即升原非正途者均作正途一
例升遷至分管官所築隄工有一處不堅固或
一二丈不豐滿合式者降一級調用兩處不堅
固或三四丈不豐滿合式者降二級調用三處
不堅固並五丈以上不豐滿合式者革職監理

官所轄分管官有一人議處者監理官罰俸一
年二人議處者降一級調用三人議處者降二
級調用四人以上議處者革職由監理官揭叅
者免坐如議處議叙相同者準與抵算若興舉
大工附近地方官不協同設法募夫不將急需
柳草等項速買解運致誤河工者題叅將州縣
官降三級調用道府降一級調用凡舉劾大計
將河工一并考成河道果無衝決或旋決旋修

不致殃民損課者方準薦舉○又議準各省河工隄岸有無衝決該督撫於年終造冊報部○

三十三年

諭嗣後隄岸衝決倘河水漫決河流不移者應否免其革職止令賠修著確議定例具奏欽此遵

旨議準嗣後隄岸衝決河流遷徙者照定例處分若隄岸漫決河流不移者免其革職責令賠修年限內漫決者經修官賠修年限外漫決者防守官

賠修○又覆準嗣後一應工完年終報部之日
將各部院堂官及科道官職名開列具題

簡命察勘埃驗明所修丈尺用過埽料等物與原估
題疏相符準其開銷如有不符巧飾謊報等情
交部嚴加議處○三十四年奉

旨察勘無益嗣後差遣察勘永行停止○三十九年

諭河工積弊汎官利於隄岸有事修建大工得以侵冒
河帑又希圖修橋建牖興無益工程於中取利著嚴

飭各官痛改前非加謹修防倘有故違定行正法以示懲戒其地方有司官漠視河工致有遺誤者題叅到日將地方官亦行正法河官平時須豫備物料以為不時修防之需欽此○又議準嗣後侵帑誤工如分管微員照例懲處其見任河官及在工効力旗員即行題叅革職○又議準嗣後呈報險工該道親行察勘確實即令動帑搶修一面估計申報總河察覈如繫假捏即以誑報題叅該道

徇隱一并叅處。又覆準嗣後隄岸衝決河流不移者管河各官皆革職戴罪勒限半年賠修分司道員各降四級督賠工完開復如限內不完承修官革職分司道員降四級調用總河降一級留任未完工程仍令賠修其應賠工程已經奏明動帑者仍將應賠銀亦照賠修例勒限處分如限內不完分司道員不揭報總河不題叅者皆照徇庇例議處。又議準凡黃河曲處

堰濬引河果屬深濶偶至淤墊者該督親勘保
題免其賠修○四十二年

詔河工官員領正項錢糧修築隄岸被水衝決應賠還
者照例追賠其自捐銀修隄完工之後被水衝決或
因地勢難築竣工無期若仍責令賠修甚屬可憫著
總河察明具題免其賠補○四十六年覆準河南隄
工由巡撫就近料理如遇水長即嚴飭管河等
官率領堡夫搶護如怠玩貽誤將該地方官照

黃河定例議處仍察明年限著落賠修○四十九年議準嗣後修防工程河道按工發帑廳官領銀承辦其微末官弁及効力人員止令防守催趲押運物料不得輕給帑金如果才優家裕該廳申詳該道轉報該督方準給發如濫委匪人致虧帑誤工者本人革去職銜限一年追完復職逾限不完出結廳官革職戴罪勒限一年賠完完日開復該道降四級亦勒限追賠完日

開復限內不完即依所降之級調用該督降一級與該道一同分賠完日開復不完每案罰俸一年仍著督道廳分賠還項○五十二年覆準嗣後修築工程該廳呈報到日該督與道員即親勘工程驗明物料具題修築工完察勘報銷如修築不堅短少物料將承修之官題叅從重治罪如該道不揭報該督不題叅者皆照徇庇例議處○雍正二年議準一應工程嚴飭承修

官據實估報如估報時仍留覈減餘地者該督撫題叅嚴加議處○又議準嗣後給發錢糧交與諳練河務之人修築如修築不堅致有衝決者委官督令賠修不能賠修者題叅革職別委賢員給發錢糧修築將所用錢糧勒限一年賠完準其開復逾限不完交刑部治罪仍著落家屬賠完如力不能完著落發錢糧之上司賠補

全完○四年

諭賠修之例甚屬無益從來河官領帑修工必豫留賠
修地步以致錢糧不歸實用工程斷難堅固即幸而
得保無虞而錢糧終歸入己似此情弊相習成風必
照侵欺錢糧例嚴加治罪方足示懲著九卿詳議具
奏欽此遵

旨議準嗣後承修之官估計工程總河與該督撫分司
勸明工段丈尺樁埽料物如果與所估數目相
符覈實具題發帑興修如估計過多有心浮冒

察出即照溺職例革職察勘之官不實心詳覈
扶同徇隱即照徇庇例議處至工完之日該總
河督撫分司再逐一察勘修過工程果否如式
堅固與原估丈尺錢糧數目相符如工程單薄
物料剋減錢糧不歸實用以致修築不堅不能
保固將承修官指名題叅照侵欺錢糧例分別
治罪其侵欺銀著落該員家產勒限追賠所修
工程令總河督撫等別委賢員動帑修築堅固

工完題銷○又議準直隸子牙河南運河新修工程均照運河例保固三年北運河工程較永定河稍平易較南運河則為險要立限保固二年限內衝決照例賠修○五年

諭向聞河工不肖之員有將完固隄工故行毀壞希圖興修藉端侵蝕錢糧者著該督時加察訪再有此等不法之員著即奏聞於工程處正法示衆欽此○又諭直隸河工衝決之處著落河官與地方官賠修再敢

惰玩一并革職枷示工所欽此○又

諭河工追賠之項其中情由不一有該員侵蝕入己者有修築草率本不堅固易致衝決應當賠修者有當潰決之時該員豫知例當賠修而以少報多先留地步者甚至有故意毀壞工程以便興修開銷者種種弊端不可枚舉皆法所難寬但亦有經手之人本無情弊而照例則應分賠者在該員情稍可原而承追之時無力全完亦於國帑無益其如何酌量分別定

例方為妥協著九卿詳議具奏欽此遵

旨議準嗣後黃河一年之內運河三年之內隄工陡遇衝決所修工程原繫堅固於工完之日已經總河督撫保題者承修官止賠修四分其餘六分準其開銷如該員修築錢糧均歸實用工程已完未及題報而陡遇衝決者該總河督撫據實保題亦令賠修四分其餘均準開銷如黃河一年之外運河三年之外隄工陡遇衝決該管各

官實繫防守謹慎者該總河督撫察實具題止
令防守該管各官共賠四分內河道知府共賠
二分同知通判州縣守備共賠分半縣丞主簿
千總把總共賠半分其餘六分準其開銷其承
修防守各官皆革職留任戴罪効力工完之日
準其開復倘總河督撫保題不實照徇庇例議
處仍照定例勒限分賠還項○又議準永定河
新修工程照黃河例保固一年○又議準嗣後

沿河州縣遇有被淹之處令地方官會同河官親勘被淹情由據實通報如有隱匿民災者照報災怠玩例議處察報不實者照溺職例議處

○八年議準嗣後不請開放之牆審度形勢果繫不應開放雖限內未開亦應準其保固年限以免承修官守候之苦如本應開放之牆承修官因修築不堅故意不請開放希圖掩飾雖已過三年仍應以開放之日起限保固並將故意

遲延之承修官及不行察報之該管官一并叅處○十年

諭河中石塊木椿抵觸糧艘著河臣嚴飭河道等官於水落時沿塗察看悉行起除以清河路倘辦理疎忽仍有起除不淨等弊著巡漕御史叅奏將該管河道等官從重議處欽此○十一年覆準永定河貼砌片石等工仍保固一年別項加修新工保固三年漳河滹沱河並太行隄工照黃河例保固一年

其餘平易工程照運河例保固三年○十二年
議準黃河堡夫挑積土方不及數者專汎文官
罰俸一年該管廳官罰俸六月挑積不及半者
專汎文官降職一級留任趙挑該管廳官罰俸
一年兵丁挑積土方不及數並不及半者專管
汎弁及該管將備議處亦如之○乾隆十年

諭從前石林口衝決用過修築工料銀二十三萬九
千一百餘兩部議著落河官賠補原以該處舊有

土壩致被衝決應照疎防之例賠修第聞石林土壩乃河臣率民修築之工並未動用錢糧與永定河官隄疎防衝決者有間且七年黃水異漲亦非尋常可比動項既多該管各官勢必艱於賠償著加恩免其追賠嗣後凡有隄防之處務須事先綢繆毋得再蹈前轍若稍有疎虞決不寬貸欽此

十五年議準嗣後開濬河道以領帑日為始限十日興工須俟水築隄者準於限外酌展半月

計土千方限半月竣工數多者準此加展修建
橋牖隄壩等工均限兩月興工工料數百兩及
千兩者以興工日為始限三月三四千兩者限
四月各竣工其工料自五千兩至萬兩以上者
如平易工程亦限四月竣工果工程險要不能
依限告竣者準於估報冊內豫行聲明酌展限
期違者皆交部議處

一種植葦柳勸懲順治十三年定瀕河州縣新

舊隄岸皆種榆柳嚴禁放牧各官栽柳自萬株至三萬株以上者分別敘錄不及三千株並不栽種者分別叅處。康熙九年奏準於沿河州縣擇閒散人授以委官名色專管栽柳三年分別勸懲。○十五年議準河官種柳不及數者免其處分成活萬株以上者紀錄一次二萬株以上者紀錄二次三萬株以上者紀錄三次四萬株以上者加一級多者照數議叙分司道員各

計所屬官員內有一半議敘者紀錄一次全議敘者加一級均今年終題報○二十年定武職栽柳照文官例議敘○二十二年定河官栽柳成活二萬株以上者紀錄一次四萬株以上者紀錄二次六萬株以上者紀錄三次八萬株以上者加一級多者照數議敘其分司道員因屬員栽柳議敘之例停止○三十一年議準河道隄面濶二丈者留八尺為行路其一丈二尺密

栽細草遇有坦坡均栽卧柳○四十四年

諭高家堰石工完者準先予銷算隄根之下廢地可諭
河員試令種稻其餘除留取土搶修之地外令捐栽
蘆荻以資工料照例議敘欽此○四十九年覆準令

河南各州縣於官地內責令堡夫廣栽柳樹○

六十年覆準河隄種植柳樹倘有將柳園地畝
墾熟耕種私收籽粒以致草漸稀少動用錢糧
購買蘆葦者將失察之地方官嚴叅議處○雍

正元年議準每年山東河南巡撫飭令近河州縣暨管河各官將沿河空地勘明各捐資多栽柳樹各以種柳細數呈報上司三年後該督撫察覈報部酌量議敘如希圖議敘強占民地累民者即行叅究至河南舊植柳樹年久枯壞者令察勘一并補種○三年議準嗣後管河之分司道員同知通判州縣等官於各該管沿河地方栽柳成活五千株者紀錄一次萬株者紀錄

二次萬五千株者紀錄三次二萬株者準加一級種葦一頃紀錄一次二頃紀錄二次三頃紀錄三次四頃準加一級其有殷實之民栽柳二萬株或種葦四頃者準予九品頂帶榮身至効力各官有情願捐栽柳葦者亦照此例議敘倘有不肖河官希圖議敘占種民地者題叅從重治罪再各處河營每兵一名每年種柳百株若不能如數栽植者將專汛之千把總罰俸一年

守備罰俸半年倘栽植不及一半者專汎之千
把總降一級暫留原任戴罪補栽守備罰俸一
年○五年覆準行令河南沿河州縣等官檢稽
地冊會同廳汎將見存柳園並從前坍塌及新
淤地畝逐一詳勘丈明立界如有隱占撥補還
額廣為栽種○乾隆三年奏準嗣後山東河南
印河文武官弁於沿河官地內有能捐資栽成
小楊五百株者紀錄一次千株者紀錄二次千

五百株者紀錄三次二千株者加一級其沿河居民有情願出資在官地栽成二千株或在自己地內栽成千株者給以九品頂帶榮身每年春間栽種次年秋間覈驗栽成數目題明議敘楊樹交汛官收管如栽成不及議敘之數準其次年補栽并算○五年議準嗣後沿河州縣地方官有能勸民在沿河坑窪沮洳不宜禾稼地內種葦二百頃以上者紀錄一次四百頃以上

者紀錄三次六百頃以上者加一級八百頃以
上者加一級紀錄一次數多者照數遞加議敘
○又議準抑勒栽葦或所栽葦地以少報多者
照官員勒民開墾地畝以少報多例州縣官皆
降一級調用○又議準嗣後州縣官所屬境內
有可栽葦草之地勸諭不力計十分之地栽植
不及三分者該督撫指叅罰俸六月不及二分
者罰俸一年不及一分者罰俸二年二年內栽

植仍不及分數者降一級住俸至三年內仍有不行栽植者降二級留任○又議準葦柳乃河工必需之料令將柳樹數目葦蔴地畝一并造入交盤冊內再豫東二省全用楊椿各汛報栽成活楊樹交與該管廳官不時稽察造入交盤如有短少詳叅著落補栽成活足數者開復○九年定葦蕩營額柴按年清完依限運交如未完一分者該汛千把總罰俸一年守備罰俸六

月叅將罰俸三月未完二分者千把總降職一
級留任戴罪督完守備罰俸一年叅將罰俸六
月未完三分以上者千把總革職守備降職一
級留任戴罪督完叅將罰俸一年均限一年照
數督催全完開復如逾限不完照所欠分數千
把總分賠六分守備三分叅將一分賠完之後
亦準開復若每年餘葦至十萬束以上者準其
紀錄一次再有贏餘照數遞加紀錄○又覆準

江南黃河兩岸柳園丈出官地官民情願捐栽柳樹培養成活者驗明確數一并造報議敘○

一禁令順治二年定旗下軍船不許零星過牘非時啓閉致妨漕運○五年覆準安山南旺兩湖地經升科者聽民佃種其餘湖地不許開墾妨漕永為令○又覆準衛河渠口每年四月以後盡行堵塞不許偷放○七年覆準運河行舟雖繫進貢及裝載官兵亦不得擅自開牘○九

年覆準沛縣湖田禁民墾種令蓄水濟漕○十
三年覆準南旺臨清大濬及各處河官堰濬本
境淤淺築壩未開之先豫頒告示禁止一應官
船不許先期逼勒開壩貽誤工程○又覆準令
河臣申明各牘啓閉禁令先放糧船次放官船
又次放商民船如有啓閉不時洩水誤漕者指
名題叅○康熙二年覆準凡奉差及赴任各官
定有限期者令糧船讓路○又定差船到牘隨

漕啓閉有攙越漕運者照例叅處○四年河臣
請嚴牘河啓閉奉

旨有奉緊要勅旨差遣者著照前行如糧船商船齊到
牘糧船先過商船繼過如糧船未到商船先到牘官
勿得指稱糧船將到強行攔阻仍著放過違者從重
治罪其一應往來官船立有欽差牌匾著永行禁止
如此等官船藉名緊急擅行啓閉於糧船之前爭先
者著該督撫指名題叅欽此○又議準凡內外顯要

職官多置號船縱容家人於漕運河道往來貿易或奉差赴任各官額外私帶貨船並姦徒假藉名色恃強闖插者河道各官指名呈報河漕總督題叅究處河道各官徇情不報亦即題叅如已呈報而總督徇情不舉者事發一并治罪

○七年議準

畿輔隄岸關繫緊要禁止附近莊佃私開渠口

八年議準直隸渾河隄工禁止車行如有損壞

者咎歸該管官○十一年題準運官停泊漕船
不聽督催陵辱牘官責打牘夫攫去牘版致洩
水誤漕者革職究擬○二十一年議準運河淺
澁漕船艱於程限各處兵船務隨漕啓閉停泊
如有扭鎖掀版恣意爭先者該督指名題叅將
領兵將弁嚴加議處○二十九年議準漕河開
隄遲則稽重運煞隄早則阻回空嗣後每年定
於十一月十五日煞隄正月二十六日開隄○

三十年覆準河南河內縣丹河發源太行山至
丹河口分渠九道內惟小丹河上秦河二渠通
衛濟漕嗣後如雨足之年於三月初用石絡裝
石橫塞河渠使水歸小丹河入衛濟漕仍留涓
滴灌田至五月秒重運已過則開放河渠塞小
丹河口以防山水漫溢倘遇亢旱之年自三月
朔至五月望令三日放水濟運一日塞口灌田
過此以後仍從民便至輝縣東刀泉為衛水之

源民間設五牘以蓄水灌田向例於五月初一日封版放水濟運但五月正農功需水之時應量渠之高下用竹絡裝石堵塞使各渠之水常盈則正流足以濟運餘潤可以灌田其安陽縣之萬金隄亦令仿束刀泉五牘之法用竹絡裝石相時塞牘通渠務使民漕兩無妨礙○三十

五年

諭山東漕船不得過牘以致遲延著差官帶戶部印封

前去封固牘版須俟水滿開牘以便漕船行走如水
不滿雖奉旨事務亦不許開牘果有緊急陸路亦可
以行凡內廷需用之物悉停解送欽此○又

諭自通州以至大通橋民船不行皆有禁令今若令小
船行走於民似有裨益著戶工二部會同倉場侍郎
會議具奏欽此遵

旨議準嗣後通州至大通橋應令民船貿易行走若遇
糧運緊急之時暫行禁止○又奉

旨打魚小船亦著行走○三十九年覆準裏河淤墊竦糧船過盡即煞壩疏濬一應差使令暫由陸路○四十四年覆準南旺湖涸出灘地不許違例耕種令地方官出示嚴禁○又覆準嗣後有故決盜決南旺昭陽蜀山安山積水等湖揚州高寶湖淮安高家堰柳浦灣及徐邳上下濱河一帶各隄岸並阻絕山東泰安等處泉源有干漕河禁例者不論軍民槩發邊衛充軍其牘官人

等用草卷閣牐版盜洩河水串通取利犯該徒
罪以上亦照前問遣○又議準漕河各牐務依
漕規啓閉官員經過不許徇情擅自開放洩水
致稽重運違者不宥○四十五年遣官往運河
閱視封牐

特諭今年水淺自臨清至天妃牐七八百里一時盡封
則不利於商人矣當從上流封牐蓄水俟水滿後再
開一牐糧船過時他船不許濫放欽此○五十三年

覆準糧船過牐務遵漕規啓閉按幫放行則水
勢充足不至遲誤至於水漲牐溜撞沉搶修乃
意外間有之事均準於單內注明務於八月內
全數卸完回空如逾定限倉場侍郎題參○五
十四年

諭大濬動工之日一應往來船槩行禁止駐防兵船回
空糧船有恃強開壩者拏解究處欽此○雍正元年
諭每年漕船遲滯皆由運河阻淺運河之水全賴山東

諸湖蓄水以資灌注近歲漸就淤積居民或占成田地以致水少不能濟運今宜乘夏秋雨水之時豫為蓄水之計凡沿河田地已經成田者不必追究其未經耕種者速宜嚴禁不可侵占至諸湖隄防須修築堅固引河插壩務啓閉得宜則湖水深廣運河流通不竭漕艘自無阻滯之虞欽此○二年

諭運河之設未嘗禁商船之往來但水少時則加意管束水大時聽商船行走京師百貨取給於東南之商

賈今若嚴禁則各種載船必一槩阻滯商賈安能流通於民生日用均屬未便欽此遵

旨覆準令總河總漕直隸山東河南各督撫檄飭沿河地方官弁遇有商賈客船許於漕船先後乘隙而行毋許漕船攔阻亦毋許商船擁擠○又議準運河一帶用強包攬牯夫溜夫二名以上撈淺舖夫三名以上者發附近充軍攬當一名並未用強生事者枷一月杖一百發落○又議準

小丹河桓河各牘令該撫嚴飭河官不時疏濬
仍遵舊制三日放水濟運一日塞口灌田於糧
船趲行回空之期該河官親至水口秉公啓閉
將水勢情形設立循環號簿五日一次報明該
管印官仍嚴禁偷放如河官通同賣水以致漕
船阻滯者指名題叅嚴加治罪○五年議準河
工關係重大嗣後有指稱夫頭包攬代雇希圖
抑勒良民者照運河一帶用強包攬牘夫溜夫

之例治罪二名以上者發附近充軍一名者枷
一月杖一百發落○十一年議準黃運河工隄
頂民房無論舊蓋新修槩令遷移○乾隆元年
題準山東運河自江南邳州交界北至德州桑
園鎮繇長千二百餘里水無來源全賴各插層
層關束務令啓閉以時蓄洩得宜庶於漕政有
益○二年

諭江南黃運兩河隄工向有民人蓋房居住者經河

臣等議令拆毀遷移以防作踐旋以小民安土重
遷止令移去險要工所之房屋其餘仍舊存留此
國家體卹貧民之恩澤也各隄民房皆無額徵租
稅惟高郵寶應江都甘泉山陽五州縣每年有應
徵租銀三百八十餘兩其間拖欠不完者往往有
之若留此輸公之項雖為數無幾而追呼不免恐
有胥吏藉端苛索之弊著將此項租銀永行停止
並將累年拖欠悉予豁免惟是隄工乃河渠之保


障理宜加意慎重以固河防除見在已成房屋無礙隄工者免其遷移外將來不許增蓋如有違禁增蓋者即驅逐治罪並將徇縱容隱之官弁分別議處欽此○又

諭今年五月山東雨少運河水淺糧艘不能銜尾而進沿塗堰淺起撥甚費經營而臨清以北更多阻滯朕細加訪察臨清以北全賴衛水合汶濟運而衛水發源於河南衛輝府至臨清五百餘里居民

往往私洩灌溉經前任河臣題定每歲於五月初一日盡堵渠口使衛水全歸運河今日久法弛衛水來源小民不無偷放遂致運河水勢長落不時重運艱於北上目前正當緊要之時所當稽察嚴禁者著直隸河南督撫速行辦理務使衛水不致旁洩糧運遄行無阻欽此○又奏準運河舊例於十一月十五日煞壩今改於十一月初一日開壩日期舊例於正月二十六日今不必拘定總

以南漕幫船至臺莊牘為準○又覆準山東運河自嶧縣臺莊起至臨清州南版牘計四十八牘牘河水無來源應照南旺挑湖之例遇重運盛行官民等船均隨漕開放不許逼勒開牘並頒發告示刊立木榜令各牘永遠遵行○又奏準運河各牘收束水勢全在啓閉得宜會牌未到催漕各官不得逼令啓版會牌已到司牘官亦不得故意遲延如有違誤該督題叅治罪○

四年奏準江南河工天然南北二壩收束諸湖
之水為洪澤湖之關鍵責令管河道員封固永
不許開



欽定大清會典則例卷一百三十三